



Republika e Kosovës / Republika Kosova / Republic of Kosova
Komuna e Podujevës / Opština Podujevo / Municipality of Podujeva

KUVENDI I KOMUNËS

Procesverbal i mbajtur më 12 shtator 2022, në mbledhjen Solemne të Kuvendit të Komunës së Podujevës, mandati i VII,

E mbajtur me rastin e ndarjes së titullit QYTETAR NDERI i Komunës së Podujevës për z.Halil Kastratin themelues i Shoqatës Bamirëse “Jetimat e Ballkanit”, për kontributin e dhënë në fushën e humanizmit në Komunën e Podujevës.

Mbledhja filloi në orën 11;15 dhe u mbajt në sallën e mbledhjeve të Kuvendit të Komunës.

Mbledhjen e hapi dhe kryesoi z.Hilmi Hoxha, Kryesues i Kuvendit të Komunës.

Në mbledhje të pranishëm ishin këshilltarët/et e Kuvendit të Komunës së në vijim; (*Valon Demolli, Edona Shabani, Arjant Topanica, Donjetë Sheqiri, Ilir Koprani, Ekrem Rrahmani, Fahri Hasani, Fitim Muçolli, Artrit Mulliqi, Adelinë Stublla, Sebastina Vokri, Drita Pajaziti, Qëndresë Hajrizi, Ragip Fetahu, Xhevdet Maloku, Ardi Hasani, Haki Rudari, Bahri Blakçori, Burim Hasani, Gazmend Islami*), ndërsa munguan,

(*Demokrat Hodolli, Arnisa Sylejmani, Arjeta Abazi, Adnan Zymeri, Qëndrim Softolli, Naim Çunaku, Tringa Sfishta, Florent Hasani, Kasib Bashota, Bashkim Sylja, Endritë Murati, Mimoza Abdullahu, Mrika Thaçi, Arbnor Fazliu*) - Lista e nënshkrimeve.

Në mbledhje të pranishëm ishin z.Shpejtim Bulliqi, Kryetar i Komunës, znj.Marigona Lahu, Nënkyetare e Komunës, Drejtorët/shat e Drejtorive të Komunës së Podujevës, (*Antoneta Ejupi-DA, Fatlum Osmani-DBF, Avni Fetahu-DKA, Leutrim Krasniqi-DPUMM, Saranda Stublla-DPKGJ, Pajtim Balaj-DKRS, Bahri Selimi-DSHPMSH, Fatmir Rudari-BPZHR*).

Gjithashtu, me ftesë të Kryetarit të Komunës, në mbledhje të pranishëm ishin edhe përfaqësues të Shoqatave të dala nga lufta, z.Fadil Mulliqi, z.Ilaz Islami, z.Kadri Balaj.

Përfaqësues të Këshillit të Bashkësisë Islame-Podujevë, z.Idriz Bilalli dhe z.Besim Llallosi.

z.Isak Shabani Kryetar i Partisë Demokratike të Kosovës-dega Podujevë dhe Deputet i Kuvendit të Republikës së Kosovës.

Gjithashtu me ftesë të Kryetarit të Komunës, në mbledhje gjithashtu të pranishëm ishin edhe z.Halil Kastrati dhe përfaqësues tjerë nga Shoqata Bamirëse “Jetimat e Ballkanit”, (z.Bled Latifi, z.Berat Kabashi, z.Tafil Oraca, z.Shkelzen Kastrati, z.Gentrit Latifi, z.Rinor Hakaj).

Në mbledhje pjesëmarrës ishin edhe media të shkruara dhe elektronike dhe një numër qytetarëve dhe zyrtarëve komunal.

1. Hapja e mbledhjes

z.Hilmi Hoxha, Kryesues i Kuvendit, e hapi mbledhjen duke përshëndetur të gjithë të pranishmit dhe duke iu dëshiruar mirëseardhje në këtë mbledhje Solemne të Kuvendit të Komunës së Podujevës e cila organizohet me rastin e ndarjes së titullit QYTETAR NDERI i Komunës së Podujevës për z.Halil Kastratin themelues i Shoqatës Bamirëse “Jetimat e Ballkanit”, për kontributin e dhënë në fushën e humanizmit në Komunën e Podujevës.

Jeni në dijeni se në mbledhjen e Kuvendit të Komunës së Podujevës të mbajtur më 30 qershor 2022, në propozim të Kryetarit të Komunës z.Shpejtim Bulliqi, kemi marrë Vendim unanimit që z.Halil Kastratin, themelues i Shoqatës Bamirëse “Jetimat e Ballkanit”, ta shpallim QYTETAR NDERI i Komunës së Podujevës, në shenjë mirënjohje për kontributin e dhënë në fushën e humanizmit dhe të mirësisë në Komunën e Podujevës.

Ndihma e Hoxhës së nderuar, për shumë familje janë shpëtim dhe lehtësim për ta jetuar jetën më mirë në këtë kohë krize globale që e ka përfshirë edhe Komunën tonë.

Në emër të Kuvendit të Komunës dhe qytetarëve të Komunës së Podujevës i jemi mirënjohës dhe falënderues zotëri Halil Kastratit për veprimtarinë e tij humane dhe mirësinë për qytetarët Llapjan.

Edhe njëherë, faleminderit i nderuar Hoxhë Halil Kastrati.

2. Fjalë rasti nga Kryetari i Komunës së Podujevës

➤ Ndarja e titullit QYTETAR NDERI i Komunës së Podujevës, dhe dhënia e dekoratës z.Halil Kastratit

z.Shpejtim Bulliqi, theksoi, i nderuar Kryesues i Kuvendit, e nderuara Nënkryetare e Komunës, drejtor të Drejtorive, të nderuar asamblistë,

I nderuar kryetar i Shoqatës “Jetimat e Ballkanit” z.Halil Kastrati, dhe ju të nderuar pjesëtarë të organizatës “Jetimat e Ballkanit”, të nderuara media dhe të dashur qytetarë, të respektuar klerik fetar, familjarë të Dëshmorëve, përfaqësues të shoqatave të dala nga lufta, ju faleminderit për pjesëmarrjen e juaj në këtë seancë Solemne të Kuvendit të Komunës.

E kemi thirrur këtë seancë solemne me qëllim që t’i ndajmë titullin QYTETAR NDERI, një humanisti të madh e një qytetari të devotshëm të Kosovës, i cili i ka ndihmuar dhe po ndihmon përmes Shoqatës “Jetimat e Ballkanit” shumë familje shqiptare në të gjitha trojet tona.

Ky është Hoxha i nderuar Halil Kastrati, me të cilin sot si Komunë e Podujevës kemi bashkëpunim të shkëlqyeshëm në fushën e humanizmit.

Për ata që nuk e njohin mirë Hoxhën dhe Shoqatën e tij, po e lexoj një pjesë të biografisë së tij, dhe atë;

Halil Kastrati ka lindur me 17 prill të vitit 1975 në Prizren, rrjedh nga një familje atdhetare e patriotike, ai është vëllai i Dëshmorit Besnik Kastrati. Shkollën fillore dhe të mesme e përfundoi në qytetin e Prizrenit, ndërsa si i ri u largua nga vendlindja për t’i vijuar studimet në drejtimin teologjik në Damask të Sirisë dhe në Jemen. Pas përfundimit të fakultetit teologjik, ai përfundoi edhe fakultetin e psikologjisë në Prizren.

Në vitin 2000, Kastrati migroi në Itali ku u përballë me shumë vështirësi të jetës, gjatë kësaj kohe i lindi ideja që të hapë një kuzhinë humanitare për njerëzit në nevojë.

Si i ri ushtroi detyrën e Imamit në Zvicër dhe Itali. Vlen të theksohet se Kastrati themeloi Xhaminë e parë Shqiptare në qytetin Kasaloldo të Italisë.

Në vitin 2009, Halil Kastrati u kthye në Kosovë për të vazhduar jetën në vendlindje. Duke e parë gjendjen e popullit të tij, shpirti i tij fisnik e bujar nuk e lejoi të bënte një jetë të rëndomtë, por filloi misionin e tij për t’i ndihmuar familjet e varfëri dhe personat e sëmurë. Ai themeloi Organizatën “Jetimat e Ballkanit” dhe që nga viti 2009 e strukturoi drejt funksionalizimit të një Organizate që sot njihet si Shoqata më kredibile në trojet Shqiptare dhe më gjerë.

Që nga themelimi e deri më tani, Shoqata “Jetimat e Ballkanit” kanë bërë me strehë mbi 1350 familje, kane ndërtuar shtëpinë e të moshuarve në fshatin Gjnoc të Suharekës ku pritet të strehohen deri në 250 të moshuar, ndërsa aktualisht ajo shtëpi ka rreth 80 banorë.

Aktualisht në tri qytete janë kuzhinat humanitare aktive ku gjatë ditës ushqehen rreth 750 persona.

Po ashtu Hoxhë Halil Kastrati ka dhënë një kontribut të çmueshëm edhe në Komunën tonë.

Shoqata Bamirëse “Jetimat e Ballkanit” me vet-iniciativë si dhe në bashkëpunim me Komunën e Podujevës kanë realizuar një mori aktivitete të ndryshme humanitare për personat në nevojë, duke filluar nga ndërtimi i shtëpive për familjet skamnore, shpërndarjen e pakove ushqimore, trajtimin e personave me sëmundje të rënda e të tjera me radhë.

Në Podujevë janë ndërtuar 80 shtëpi të reja, ku 48 prej tyre janë në bashkëfinancim me Komunën e Podujevës, ndërsa pjesa tjetër me vet-iniciativë dhe financim të Shoqatës “Jetimat e Ballkanit”, janë shpërndarë deri më sot mbi 2500 pako me produkte ushqimore e higjienike, raste të ndihmuar për shërim janë mbi 10 persona të cilët janë financuar për tu shëruar brenda dhe jashtë vendit, janë ndarë dhjetëra bursa për fëmijë jetim dhe studentë me gjendje të rëndë ekonomike.

Komuna e Podujevës është shumë falënderuese ndaj Hoxhës dhe Shoqatës së tij, për bashkëpunimin e jashtëzakonshëm që e kemi pasur në vazhdimësi.

I zgjedhur nga qytetarët e Komunës së Podujevës si Kryetar i Komunës kam nderin dhe kënaqësinë që në emër të qytetarëve dhe institucionit të Komunës së Podujevës t’i ndaj titullin QYTETAR NDERI i Komunës së Podujevës z.Halil Kastrati themelues i Shoqatës Bamirëse “Jetimat e Ballkanit”, për kontributin e dhënë në fushën e humanizmit në Komunën e Podujevës.

Ju faleminderit, dhe shfrytëzoj nga rasti që të ftoj zotëri Halil Kastratin ta pranon dekoratën me titullin QYTETAR NDERI i Komunës së Podujevës.

Kryetari i Komunës z.Shpejtim Bulliqi në mënyrë solemne i dhuron dekoratën me titullin QYTETAR NDERI i Komunës së Podujevës, z.Halil Kastratit, themelues i Shoqatës Bamirëse “Jetimat e Ballkanit”, për kontributin e dhënë në fushën e humanizmit në Komunën e Podujevës, për çka në shenjë mirënjohjeje dhe respekti pritet me një duartrokitje nga të pranishmit.

Pas solemnitetit të dorëzimit pranimit të dekoratës, z.Halil Kastrati ftohet për një fjalë rasti.

3. Fjalë rasti e z.Halil Kastrati, themelues dhe përfaqësues i Shoqatës Bamirëse “Jetimat e Ballkanit”.

z.Halil Kastrati, theksoi, i nderuar Kryetar i Komunës, i nderuar Kryesues i Kuvendit, e nderuara zonja Nënkryetare e Komunës, drejtor dhe drejtoresha të Drejtorive të Komunës së Podujevës, Kuvendar, familje të Dëshmorëve, të nderuar të pranishëm dhe i nderuar Bled Latifi, me të vërtetë sot jam i emocionuar sepse sa është privilegj për mua si Halil dhe stafin dhe Shoqatën që unë e udhëheqë, njëkohësisht është edhe përgjegjësi më e madhe për neve.

Ky çmim, ky nderë dhe ky titull është për të gjithë Shqiptarët të cilët kanë ndarë kafshatën nga djersa e tyre për të kthyer shumë buzëqeshje në shumë familje nevojtare në Kosovën tonë dhe në trojet tjera Shqiptare, e që me të vërtetë është se unë po i prijë këtij karvani humanitar, por realisht dhe faktikisht meritoret kryesor janë njerëzit donator Shqiptarë ku do që janë të cilët po mundohen të kryejnë këtë vepër humanitare, dhe mandej përveç donatorëve është stafi im dhe i Shoqatës “Jetimat e Ballkanit” që janë djem të rinj të cilët kanë sakrifikuar rininë e tyre dhe kanë marrë mision të shenjtë këtë vepër humanitare si synim i imi dhe i stafit tim e që pasha Zotin nuk e kemi nisur të marrim tituj nëpër Kuvende të ndryshme të shqiptarisë, por synimi i vetëm është ta gjejmë një mirënjohje dhe një titull tek Zoti, kjo është më e rëndësishmja dhe synim i yni sepse puna jonë është punë me emocione, nuk është lehtë t’i qëndrohet lotit të nënës përballë, ofshamës së babës.

Janë mbi njëmijë e pesëqind familje që janë bërë me shtëpi, veç gjokset tona e dinë se çfarë mbajmë brenda, sa e sa skenarë, sa e sa histori, madje ndoshta na shihni duke u ushqyer por faktikisht shumë herë kafshatat na mbesin në fyt ngase dikush dëshiron të të nderoj mirëpo në atë moment të shfaqet ndonjë skenar dhe të mbetet buka në fyt, andaj e them se gjokset tona mbajnë situata shumë të rënda e që janë disa skenarë që ne do t'i bartim me vete kur të dalim para Zotit.

Mirënjohës prej tokës në qiell të gjithë atyre që na kanë besuar që ne t'i prijmë këtij karvani të humanizmit, mirënjohës dhe falënderues për të gjithë Ju Kuvendar të cilët keni ngritur dorën të na dhuroni motiv por edhe forcë që ne të mos ndalemi.

Faleminderit Llapjan që prej ditës së parë të themelimit të Shoqatës Bamirëse “Jetimat e Ballkanit” kemi pasë Llapjan donatorë dhe të mirë e që njëri prej tyre është edhe Bled Latifi i cili është prezent këtu për të cilin do të doja një duartrokitje nga ne këtu. Faleminderit Bashkësi Islame, Zoti ju ruajt dhe nderoftë. Faleminderit i nderuar Kryetar i Komunës dhe të gjithëve që sot më keni nderuar, por faktikisht unë po marrë përgjegjësi më të madhe për Llapin tani e tutje, Zoti ju shpërbleftë.

Kryesuesi i Kuvendit, duke falënderuar Hoxhë Halil Kastratin i uroj shumë suksese në rrugën e tij bamirëse së bashku me bashkëpunëtorët.

z.Shpejtim Bulliqi, Kryetar i Komunës, theksoi, i nderuar Hoxhë Halil Kastrati, Ju falënderoj shumë për fjalët e mira, dhe me këtë rast shfrytëzoj rastin të përshëndes dhe falënderoj për pjesëmarrje edhe Deputetin e Kuvendit të Republikës së Kosovës z.Isak Shabani.

E ceku edhe Hoxha i nderuar se një individ i veçantë në këtë rast e që mendoj se meriton ta ketë një Mirënjohje të veçantë për krejt angazhimin e tij, e që e gjithë anëtarësia dhe njerëzit që punojnë në këtë Shoqatë të gjithë meritojnë Mirënjohje të veçantë, por kësaj radhe kemi vendos që z.Bled Latifin ta vlerësojmë me një Mirënjohje në emër të Kuvendit të Komunës dhe Kryetarit të Komunës, dhe me këtë ftoj Bled Latifin për marrjen e Mirënjohjes.

Kryetari i Komunës z.Shpejtim Bulliqi gjithashtu me solemnitet dhuron Mirënjohje z.Bled Latifit, në shenjë respekti për bashkëpunimin, angazhimin, punën dhe kontributin e tij në Shoqatën bamirëse “Jetimat e Ballkanit, për çka pritet me një duartrokitje nga të pranishmit.

Kryesuesi i Kuvendit, theksoi, edhe njëherë falënderojmë Hoxhë Halil Kastratin dhe gjithë bashkëpunëtorët e tij për gjitha angazhimet dhe kontributin e tyre në Komunën e Podujevës duke shpresuar që ky bashkëpunim të vazhdoj.

Po ashtu ju falënderoj të gjithëve për pjesëmarrje, dhe me kaq e konsideroj të përfunduar këtë seancë.

Mbledhja përfundoi në ora 11:30

Procesverbalin e mbajti

Enis Sheholli

Nr.prot.01-060/04-0078695/22

Podujevë,

12 shtator 2022

Kryesuesi i Kuvendit

Hilmi Hoxha